

**Uunga siunnersuut Nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisaat (Nalunaaquttat ingerlaqatigiiffiannut allamut ikaarsarneq, aasaanerani nalunaaquttap atorunnaarsinneqarnera)**

(Siumut gruppi)

**Akissuteqaat**

(Naalackersuisut Siulittaasuat)

**Siullermeerneqarnera**

Nalunaaquttap aalajangersarneqarnera pillugu Inatsisartut inatsisaata allanngortinneqarnissaanik siunnersuut pillugu Siumumiit siunnersuuteqartut saqqummiussaqaqarnerannut Naalackersuisut sinnerlugit qutsavigaakka. Nalunaaquttap ingerlaqatigiiffiata UTC -2-mit UTC -3-mut utertitsinissamut aamma aasaanerani nalunaaquttap atorunnaarsinneqarnissaanik siunnersuutaavoq. 2022-mi Inatsisartut ukiakkut ataatsimiinneranni nalunaaquttat ingerlaqatigiiffiannut UTC -2-mut allanngortinneqarnera akuersissutigineqarpoq ullorlu 25. marts 2023-mi atulersinneqarluni.

Ulluinnarni inuunitsinni nalunaaquttat ingerlaqatigiiffiata aalajangersaaffigineqarnera pingaarutilimmik inissisimavoq. Nunami isorartoqisumi najugaqarpugut taamaattumillu nalunaaquttap ingerlaqatigiiffia nutaaq UTC -2 assigiinngitsumik misigineqartarpoq. Nikisinneqarnerata kingorna qisuariaatit assigiinngisitaarsimapput. Nalunaaquttap ingerlaqatigiiffitoqaanut ilai uterusuttut, allalli allannguinnermut iluarisisimaarinnittut.

Nalunaaquttap ingerlaqatigiiffia nutaaq UTC -2 nutaanik periarfissiivoq. Inuussutissarsiortut pisortaqarfiillu nalunaarput, suleqatigisaminnik Kalaallit Nunaata avataaniittunik attaveqarfiginissaanut pitsaaneruseqarnera periarfissaqalersimallutik. Inuussutissarsiortunut aamma aningaasaqarnikkut pitsaasumik kinguneqartitsisimavoq assersuutigalugu timmisartuutileqatigiiffik Air Greenland nunani tamalaani timmisartuussinissamut periarfissagissaarnerulersimavoq. Innuttaasoqarpoq ualikkut qaamanerusalernera kingunerisaanik silami sammisaqarnissamut ilaqutariittullu inuunermut periarfissat pitsaaneruseqarnera misigisaqartunik. Allalli ullaakkut kingusinnerusukku qaammartarnera pitsaannngitsutut misigilaugu. Nalunaaquttap ingerlaqatigiiffia nutaaq innuttaasut ilaanut ullup unnuallu ingerlasarnerannut sinittarnerannullu piffissap nikinnera pissutigalugu ajornartorsiuteqartitsisimasutut misigivaat.

Nalunaaquttap inissinnera inuunitsinnut annertuumik pingaaruteqartumik inissisimavoq. Taamaattumik Kalaallit Nunaat nalunaaquttap ingerlaqatigiiffia sorlermiissanersoq, aasaanerani nalunaaquttamik aqqissuussineqassanersoq, aalajangiinnermut peqqissaartumik naammaginartumillu tunngaveqartumik aalajangiinnerup tunngaveqartariaqarnera pingaaruteqarlunnarpoq.

Naalackersuisut qilanaaraat Inatsisartuni tusarniaanermi isummersuutaasimasut ilaatigut aallaavigalugit Inatsisartut Inatsisissaata oqaluuserineqarnerani isummersornissaat.

Inatsisartut ataatsimiittarfianni oqallinnissamut Naalackersuisut qilanaarput. Qujanaq.